


He Whakatau

Me mātua pānui kia mārāma rawa koe i ngā whārangi 8–14 o tēnei pukapuka.



He whakarāpopoto

Pānuihia te whakarāpopoto ki te ākonga. Ki a Hōkioi ko ia anake te manu toa katoa ki te rere ki te tihi o ngā rangi. Kia tūpato! He whakautu anō tō te whakahihī.

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Matapakihia ētahi kōrero o neherā mō tētahi kōrero paki e pā ana ki te whakataetae. I ahu mai te whakataetae mai i a wai? He aha te hua kei roto i te whakataetae? Tirohia te uhi kia puta ai ngā kōrero mō te āhua o Hōkioi. Ki a Hōkioi kāre tētahi i tua atu i a ia, nō reira, whai tonu ia kia tutuki rawa tāna i whakarite ai. Auē, he utu nui te mutunga. Kua whai anō koe i te huarahi, ahakoa te aha kia ū mārika ki tāu i whakarite ai? He aha hoki te hua i puta?

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārāma ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitiore, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha i whakaaro ai he manu miharo a Hōkioi?
2. He aha ngā tino kaupapa e rua i whakataetae ai ngā manu?
3. Ko wai i toa i te whakataetae?
4. Me pēhea tātou e mōhio ai ki tētahi o ngā wāhi i tapaina i roto i te paki nei?
5. He paki tēnei mō tētahi manu kua kore e kitea i nāianei. He aha ētahi o ngā manu rite ki te Hōkioi?

Ngā whakautu ki ngā whakapuaki māramatanga

1. I te kaha tiketike o tana rere kore rawa e kitea atu e te tangata.
2. Ko tētahi he utu wero a Kāhu, ko tētahi kore rawa a Hōkioi e kereū.
3. Ko Kāhu.
4. He maha ngā whakautu rerekē.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtaka

T He whakahāngai i ngā kiwaha ki ngā āheinga e tika ana.

He whakatakinga ā-roro, he whakaharatau

He tipako i ētahi āhuatanga reo, arā, te kiwaha me tōna āheinga tētahi tino kaupapa kei roto i te kōrero paki. Ko te kiwaha he kianga whakaatu i tētahi āheinga.

Kiwaha
e hoa
koretake

Āheinga
whakatau (wh. 3)
whakaiti (wh. 4)

I muri i te pānui a te ākonga i te pukapuka me tautuhi, me matapaki rawa ngā kiwaha kātahi ka tuhi ka whakaharatau ai i roto i tētahi āheinga. Me whakaharatau takirua kia taunga rā anō ngā ākonga ki te tino āheinga o ngā kiwaha, kātahi ka whakahāngai ai ki tētahi kiripuaki mai i te pukapuka.